

Organisacion Caballista Aruba a dedica nan promer evento

Competencia di Jinete y Amazona na un baluarte Gino Werleman



ORGANISACION Caballista Aruba (OCA) tabata tin nan promer competencia di aña 2019 organisa pa nan Directiva nobo. Fin di Januari e proceso democratico a tuma lugar unda den un Algemene Leden Vergadering OCA a eligi su Presidente nobo Sr Arnold "Nolly" Martinus hunto cu su miembronan di Directiva nobo Myron Wever Vice Presidente, Leticia Valdez 1st Secretaris, Juliana Cardona Benevides 2nd Secretaris, Alina Mansur 1st Tesorero, Ignar Genser 2nd Tesorero, Fernando Lewis Comisiario. Despues di esaki e Directiva a keda encarga pa organisa nan promer evento.

Diasabra 30 y diadomingo 31 di Maart a tuma lugar Competencia di Jinete y Amazona na Rancho Bello Amanecer. Durante apertura Presidente Noli Martinus hunto cu su Directiva a yama Parlamentario Endy Croes representando Gabinete Wever Croes y Minister di deporte Sr. Danqui Oduber pa haci entrega di un plakkaat. Poco mas despues a manda yama dilanti un baluarte den e ramo di cabay esta Gino Werleman pa homenahe su persona dedicando e evento aki na su nomber. Gino Werleman acompaña pa su famia entre otro kerido tata y mama Oscar y Maritsza Werleman cu su esposa Juliana mas cantidad di amistadnan cu tabata presente. Endy Croes a hiba un speech y despues bay over na lesa e texto riba e bunita plakkaat di reconocimiento entregando



esaki na Gino Werleman. Mas cu claro momentonan di hopi emocion ora Bo ta wordo reconoci pero alabes un momento di alegria y satisfaccion total. MC Juan Zuleta a repasa poco di e historia bunita di Gino Werleman. Gino su bida cabayista a cuminsa hopi tempran y ta danki na su mayornan cu a regal'e un cabay yegua cu yama Romantica.

Ya na un edad di 3 aña Gino a cuminsa core su yegua Romantica su so. Na edad di 10 aña e tabata warda su mama pega soño merdia y e tabata huy bay Rancho Niñas pa topa Nico Heinze kende a siñe pa e no tin miedo di cabay mientras Manuel Zuleta a siñle e respet cu e mester tin pa cabay y con pa trata bestia, cuida nan boca y presenta bon. Cu e apoyo di su kerida mama y papa Gino a lanta cu un enorme amor y pasion pa cabay. Gino ta conoci pa prepara cabaynan cu problema y maneha nan di tal forma sacando mihor probecho di nan destacando asina den competencia. Gino Werleman a fungi tambe como head

coach di seleccion di Aruba. Banda di esaki Gino a percura pa siña su yiunan y sobrina pa lanta den e deporte di equitacion aki. Gino tur pero tur dia ta dedica y train su cabaynan y semper ta presente na tur feria. Den bon y menos bon momento cual sigur ta di aprecia. Gino hunto cu su yiu di 12 aña a representa Aruba na diferente ferianan internacional manera Coro, Barquisimetro, Punto Fijo y Corsow. Gino su palabranan di semper ta "Respet bo cabay pa E respet bo, y no haci cun'e locual bo no kier nan haci cu Bo".

Gino ta mira cabay manera un miembro di famia y hasta ta papia cu nan. Directiva di Organisacion Caballista Aruba (OCA) a gradici Gino Werleman pa su aporte y dedicacion na deporte y merecidamente ta dedica Competencia di Jinete y Amazona 30 y 31 Maart 2019 na su honor. Masha masha Danki Gino pero alabes danki na Bo mayornan, esposa, yiunan y henter famia cu ta sostene Bo cu henter nan curason. Pabien!!!!